



Protocol dalla radunonza generala dalla CGS dils 28-11-2018, 10.00 ella claustra dallas soras dominicanas a Glion

approbaus ella rg dils 20-11-2019

1. Beinveggni

Il president Francestg Friberg arva la radunonza e fa beinveggni a tut ils presents.

2. Preschientscha

Francestg supplichescha da nudar la preschientscha sin las gliestas che curseschien.

3. Approbaziun dalla gliesta da tractandas

La gliesta da tractandas vegn approbada unanimamein.

4. Elecziun da dus dumbravuschs

Sco dumbravuschs vegnan Toni Schuoler e Roger Tuor elegi.

5. Presentaziun ed approbaziun protocol radunonza generala 2016

Il protocol ei vegnius tarmess per mail allas commembras ed als commembers sco era vegnius publicaus sin www.cgsurselva.ch. Ei vegn buca giavischau da preleger il protocol. Il protocol vegn approbaus senza midadas e senza cuntervuschs cun engraziar agl actuar.

6. Rapport presidial ed approbaziun

Francestg prelegia siu rapport presidial che vegn lu era publicaus silla pagina d'internet dalla CGS (www.cgsurselva.ch). Francestg entra sin differentas activitads dalla CGS:

- Evaluaziun Di da romontsch 2017
- Svilupparaziun ed organisaziun dil Di da romontsch 2018
- Plan d'instrucziun 21 romontsch ed ils mieds d'instrucziun
- Mieds d'instrucziun
- Revisiun dils statuts dalla CGS
- Center linguistic online – CELION
- Center didactic romontsch online – CEDID
- Collaboraziuns dallas treis conferenzas scolasticas CGL, CRGC e CGS
- Collaboraziuns cun ulteriuras instituziuns ed uniuns parentadas culla CGS
- Fegl scolastic grischun (LEGR)
- Contribuziun annuala CGS e daner da cuors Di da romontsch

Aluis Hosang admetta in grond engraziament a Francestg per tut sia gronda lavur ch'el fa per la CGS, e damonda las presentas ed ils presents alla radunonza da mussar ina approbaziun cun alzar il maun. Il rapport presidial vegn approbaus unanimamein cun in ferm applaus.



7. Revisiun statuts

Francestg presenta ils novs statuts, entra e declara ina midada ni l'otra. La revisiun dils statuts novs vegn lu acceptada unanimamein.

8. Rapport dalla cassiera e dils revisurs ed approbaziun dil quen

entradas	5780.00	frs.
expensas	8385.95	frs.
sperdita	2605.95	frs.
activas	133.40	frs.

La cassiera Catarina Steger presenta il quen. Il quen vegn approbaus unanimamein suenter haver udiu il rapport dalla revisura da quen Manuela Cadalbert. Il president engrazia alla cassiera sco era alla revisura da quen.

9. Preventiv 2018/19

Nossa cassiera Catarina presenta e declara ch'ella hagi fatg dus preventivs. In cun schar la contribuziun annuala (20 frs.) ed il daner da cuors (20 frs.) sco il 2018, e l'auter cun alzar la contribuziun annuala sin 30 francs ed il daner da cuors sin 40 frs. La calculaziun muossi ei ner sin alv. La CGS stoppi augmentar las entradas, autramein sappi ella buca cuntinuar cun la purschida a caschun dil Gi da romontsch sco ils onns vargai.

10. Fixaziun contribuziun annuala e fixaziun contribuziun pariticipaziun al Di da romontsch

La raspada da scolastas e scolasts accepta la proposta dalla suprastonza d'alzar la contribuziun annuala sin 30 francs ed il daner da cuors sin 40 francs. Ina persuna presenta s'abstegn da vuschar.

11. Propostas/iniziativas dallas commembras / dils commembers:

Ei vegn fatg neginas propostas ord il ravugl dalla radunonza.

12. Informaziuns

Mintgin cuschin

Patricia Cadruvi presenta la rimnada da receipts digitala che senumna « Mintgin cuschin ». Il mied sa vegnir cargaus giu gratuitamein da iTunes.

Plinavon presenta Patricia era il mied didactic che senumna «Dil graun al paun» che vegn era purschius il suentermiezdi sco luvratori.

Ils Schuobacheclers

Quei mied didactic che porscha material per elaborar il tema digl ir el Schuob sco fumegl e fumitgasa vegn presentaus dallas auturas las qualas porschan medemamein in luvratori il suentermiezdi. Ei setracta da Nina Casanova, Andrea Veraguth ed Andrea Monn. Sustegn han ellas aunc retschiert dad Edith Albin, collaboratura dil Museum regional Sursevla.



Museum regional Surselva

Marianne Fischbacher, curatura dil Musuem Regional Surselva (MRS), informescha davart igl intent e la purschida dil MRS. Il MRS emprovi d'intermediar cultura allas visitadras ed als visitaders cun agid da luvratoris sco per exempel culs luvratoris "Dil graun al paun" ni "Ils Schuobacheclers". Ils cuosts per la viseta dil MRS hagian ei medemamein saviu sbassar, quei grazia ad ina donaziun. Momentan vegni il MRS renovaus. Sin primavera duessien quellas lavurs denton esser terminadas.

Ligia Romontscha

Conradin Klaiss porta ils salids dalla *Ligia Romontscha* e dat enqual informaziun. El fa attents allas occurrenzas da giubileum 100 onns Ligia Romontscha che hagian liug a Zuoz igl uost digl onn proxim.

La Plema d'aur vegni era a porscher il 2019 la pusseivladad d'inoltrar texts.

Igl atun 2018 seigi la lescha da scolas medias vegnida revidida totalmein ed acceptada dil Cussegl grond. Sche quella lescha entri en vigur, hagi la Regenza (finalmein) in instrument per pretender dils gimnasis ina promoziun speciala pil romontsch e pil talian. Ina mesira sappi esser, che la Regenza pretendi dils gimnasis sin intschess romontsch dad introducir e menar ina maturitad bilingua grischuna romontsch-tudestg, vegli dir, ina maturitad che porschi 4 lecziuns da romontsch e 2 lecziuns instrucziun immersiva per romontsch (p.ex. historia) naven dalla 3. classa gimnasiala. Quei model detti ei el cantun Grischun gia dapi igl onn 2014 – Mustér per exempel hagi denton tochen oz buca introduciu quel, malgrad il fatg ch'il cantun sustegni ils gimnasis cun ina summa da 39'000 francs per mintga classa che vegni menada separadamein.

La LR enqueri scolastas e scolasts che seigien prompts da dar *cuors da romontsch*.

Cuors da romontsch FRR

Ils Cuors da romontsch dalla FRR detti ei gia dapi 50 onns. Francestg seigi staus 30 onns al tgamun. Ussa surpendi Conradin Klaiss la direcziun. Il level 10 seigi concepìus aschia che era scolastas e scolasts da lungatg mumma romontsch sappien separticipar.

Valischa didactica "Mathias Spescha"

Lisa Schmidt-Candinas presenta la valischa didactica dil Museum La Cuort Ligia Grischa da Trun. L'ovra seigi naschida en collaboraziun cun la pedagoga d'art Alexa Giger. La valischa seigi adattada per differents scalmes (primar, superiur). Il museum seigi aviarts suenter Pastgas tochen la fin october. S'annunziar sappien ins tier Dora Candinas, Rabiun.

Acziun pacs da Nadal

Jacqueline Pfister presenta cuortamein l'Acziun pacs da Nadal.

Sin Lautget

Asa Stina Hendry informescha ch'ella porschi prelecziuns cun siu cudisch "Sin Lautget" ellas scolas.



Publicaziuns novas

Francestg presenta cuortamein differentas publicaziuns novas, interessantas era per la scola:

- Filtric
- Campiuns da ballapei 01 (OSL/SJW)
- Campiuns da ballapei 02 (OSL/SJW)
- Calender per Mintga gi
- Calender romontsch
- La Cigna

13. Varia

Francestg fa attents co il program cuntinuescha.

Silsuenter dat ei in cuort cant aviert cantond las canzuns "Giu enten quella val" e "La sera sper il lag".

Francestg engrazia als presents ed allas presentas per la participaziun, allas referentas ed als referents per lur lavur, alla Casa da sentupada per la hospitalitad. In engraziel special admetta Francestg allas consuprastontas ed als consuprastonts per la fetg buna e biala collaboraziun duront igl entir onn surdond a mintgin in pign regal personal.

Il president siara la radunonza allas 11:25.

igl actuar
Pieder Antoni Halter

Appendix: - Rapport presidial 2018



RAPPORT PRESIDIAL

Per mauns dalla radunonza generala annuala dils 28.11.2018

1. Sesidas da suprastonza

Las commembras ed ils commembers da suprastonza dalla CGS (Catarina Steger, cassiera; Ricarda Caderas, assessura; Aluis Hosang, vicepresidente; Pieder Antoni Halter, actuar; Francestg Friberg, president) han salvau el decuors digl onn da gestiun 2017/18 en tut tschun sesidas: 06.12.2017, 21.02.2018, 16.05.2018, 24.10.2018, 27.11.2018. Sper las sesidas dall'entira suprastonza han giu liug ulteriuras sesidas specificas, e sco pil solit numerus contacts per mail.

2. Activitads

La suprastonza CGS ei sededicada igl 2017/18 allas suandontas activitads:

- Evaluaziun dil Di da romontsch 2017
- Sviluppaziun ed organisaziun dil Di da romontsch 2018
- Plan d'instrucziun 21 ed ils mieds d'instrucziun
- Mieds d'instrucziun
- Revisiun dils statuts dalla CGS
- Center linguistic online – CELION
- Center didactic romontsch online – CEDID
- Collaboraziuns dallas treis conferenzas scolasticas CGL, CRGC e CGS
- Collaboraziuns cun ulteriuras instituziuns ed uniuns parentadas culla CGS
- Fegl scolastic grischun (FS dil LEGR)
- Contribuziun annuala CGS e daner da cuors Di da romontsch

3. Evaluaziun dil Di da romontsch 2017

Ils resuns dil Di da romontsch 2017 dai a bucca sco era a scret per mail ein stai fetg positivs. Ei para dad esser il giavisch da cuntinuar en quella moda.

4. Sviluppaziun ed organisaziun dil Di da romontsch 2018

Las finamiras centralas dalla dieta ein da possibilitar inscunters en in ravugl romontsch ed il dar impuls e support alla scola romontscha. Quei sereflectescha era ella purschida dil Di da romontsch dils 28.11.2018 al qual 160 personas ein s'annunziadas.

Igl avonmiezdi ei organisau ina prelecziun litterara, la radunonza generala dalla CGS, e silsuenter cant romontsch en pliras vuschs. Suentar il gentar communabel, medemamein en claustra, vegn purschiu sis differents luvratoris. Il program detagliau digl entir di ei d'anflar sco appendix a quest rapport. Jeu engraziell da cor a tuttas e tuts ch'ei s'engaschai pil Di da romontsch 2018, en tut special a nossas menadras ed a nos menaders dils luvratoris Nadia Cathomas, Andrea Veraguth, Andrea Monn, Nina Casanova, Aurelia Bergamin, Patricia Cadruvi, David Flepp, Rilana Cadruvi, Monique Huonder, sco era al scribent e poet Martin Fontana (prelecziun litterara), a Myriam Pelican Camenisch (moderaziun dalla prelecziun litterara), Petra Cavelti dil MRS (collaboraziun al luvratori "Dil graun al paun"), Edith Albin dil MRS (collaboraziun al



lurvatori “Ils Schuobacheclers”), e plinavon a Marianne Fischbacher ed a sias collegas dil MRS per la collaboraziun en connex culla elaboraziun dil material didactic “Dil graun al paun” e “Ils Schuobacheclers”.

5. Plan d'instrucziun 21 romontsch ed ils mieds d'instrucziun

Cugl onn da scola actual ei il P21 ius en vigur per tuttas classas cun excepziun dalla 3. superiura che suonda igl onn proxim. La realisaziun dils mieds d'instrucziun romontschs prospereschon.

Mediomatix:

- Realisai ed edi ein ils mieds da romontsch per la 2. primara e per la 3. superiura.
- Ils mieds per la 3. primara e per la 2. superiura ein en elaboraziun, previ d'edir per igl onn da scola 2019.
- Quels per la 4. primara e per la 1. superiura ein previ d'edir per igl onn da scola 2020.
- Quels per la 5. primara e per la 6. primara ein previ d'edir per igl onn da scola 2021.

NaTec:

Aschia senumna il mied d'instrucziun per il rom natira/carstgaun/societad (NUS) per las scolas primaras che la Regenza grischuna ha decidu il 2017 da schar translatar dil tudestg els idioms ed en rg.

- NaTec 3/4 ei cumpariu per l'entschatta digl onn da scola 2018.
- NaTec 5/6 ei previu d'edir per igl onn da scola 2019.
- NaTec 1/2 ei previu d'edir per igl onn da scola 2020.

Malgrad la ludeivla prosperaziun eis ei da constatar ch'ei maunca mieds d'instrucziun adequats al temps e coherents al P21 per ils suandonts roms:

- MU (cant e musica)
- AF (art figurativ)
- ATT (art tecnic, art textil)
- ERC (etica, religiuns e cuminonza)
- ELT (economia, lavur e tenercasa)
- MI (medias ed informatica)

En in communicau dil cantun digl atun 2017 scriva el en connex culla decisiun davart la realisaziun da NaTec: “Cun *NaTech Primarstufe* pon pia en il futur vegnir instruids passa la mesadad dals cuntegns pretendids dal Plan d'instrucziun 21 Grischun en tut las linguas da scola e conform al plan d'instrucziun.”

6. Mieds d'instrucziun

La situaziun generala davart ils mieds d'instrucziun romontschs ei vegnida dilucidada survart sut “Plan d'instrucziun 21 romontsch ed ils mieds d'instrucziun”. Cunquei ch'ils mieds d'instrucziun romontschs dil cantun ein era vinavon buca avonmaun sco quei ch'els duessen e stuessen, s'engascha la CGS era vinavon per la realisaziun da tals.



El decuors digl onn vargau ei la CGS sestentada en tut special per las suandontas treis publicaziuns:

- Filtric
- Dil graun al paun
- Ils Schuobacheclers

Filtric:

El rapport presidial dil 2017 hai jeu giu rapportau davart la genesa dil mied d'instrucziun *Filtric* e fatg menziun che en in proxim pass dueigien ils fegls che cumparien online vegnir translatai. Quei ei succediu el decuors dil davos onn. A caschun dil Di da romontsch 2018 porscha Nadia Cathomas-Sgier in luvratori davart *Filtric* nua ch'ella presenta igl elaborat mussond pusseivladads co duvra il fegls da lavur. Il mied ei publicaus sin in stic che sa vegnir retratgs tier la CGS. Ei setracta da 320 paginas fegls da lavur e da 190 illustraziuns, translatai dalla Nadia sezza. Per quella nova ediziun segna la CGS.

Material didactic davart "Dil graun al paun" e "Ils Schuobacheclers":

Igl impuls per ils dus elaborats didactics ha la suprastonza dalla CGS survegniu entras il leporello *Museum Regiunal Surselva, empruar, experimentar, explorar, entelgir*. En quel ein ils suandonts 7 luvratori d'eveniment presentai:

- Dil fil alla teila (1.-3. classa)
- Far lischiva e savun (1.-3. classa)
- Spassegiada alpestra cun far pischada (1.-6. classa)
- Tura d'affons cun guid (1.-6. classa)
- Paun sur la burnida (1.-6. classa)
- Ils Schuobacheclers (3.-6. classa)
- Memory Tour el marcau vegl da Glion (3.-6. classa)
- Pistregn, frina e paun (1.-6. classa)

La suprastonza dalla CGS ha giu contactau igl atun 2017 sias commembras e ses commembers per dumandar sch'enzatgi fussi prompts d'elaborar material didactic tier in dils treis luvratori "Spassegiada alpestra cun far pischada", "Paun sur la burnida", "Ils Schuobacheclers". Sinquei ein tschun scolastas s'annunziadas e demussau lur promptadad da s'engaschar pils dus luvratori "Dil graun al paun" ed "Ils Schuobacheclers". El decuors digl onn han las duas gruppas sviluppu fetg interessant material che sa vegnir duvraus en differents roms ed en cumbinaziun culla viseta dil MRS. A caschun dil Di da romontsch 2018 vegnan las auturas Andrea Veraguth, Andrea Monn, Nina Casanova a presentar en collaboraziun cul MRS "Ils Schuobacheclers", e las auturas Aurelia Bergamin e Patricia Cadruvi a presentar medemamein en collaboraziun cul MRS "Dil graun al paun". Omisdus luvratori san vegnir retratgs tier la CGS che segna per las duas ediziuns.

Engaschi dalla CGS per mieds d'instrucziun:

Ulteruramein ei la suprastonza dalla CGS s'engaschada el decuors digl onn quei che pertucca mieds d'instrucziun romontschs cun numerus contacts ed en differentas sesidas cun pliras instituziuns ed uniuns, en tut special cul LEGR, representaus entras sia presidenta Sandra Locher Benguerel, e culla LR, representada cul responsabel per la sparta formaziun, Conradin Klais.



7. Revisiun dils statuts dalla CGS

Ina revisiun ei stada indicada en tut special pertuccont ils suandonts puncts:

- Organ official dalla CGS (pagina d'internet)
- Definiziun dalla commembranza (dretg da vuschar)
- Fixaziun dil termin dil Di da romontsch (davosa mesjamna da november)
- Nums da certs roms en connex cul P21 (ATT, ERC, ELT, ...)
- Cumparsa CGS (logo, pagina d'internet)
- Situaziun da CEDID/Center didactic online (novs mieds d'instrucziun)

Las propostas d'actualisaziun proponidas dalla suprastanza vegnan suttemessas a questa radunonza generala dils 28.11.2018.

8. Center linguistic online – CELION

Il center linguistic online CELION, la plattafuorma dallas treis Conferenzas generalas romontschas CRGC, CGL, CGS, ei in survetsch dallas Conferenzas che porscha in sustegn linguistic a sias commembras ed a ses commembers che san inoltrar texts romontschs sin la pagina www.celion.ch per schar lectorar. Ils lecturs curregian ils texts inoltra e tuornan puspei quels via la medema pagina cun in commentari linguistic. Ils utilisaders san aschia emprender ord il commentari e perfecziunar lur cumpetenza linguistica, sco secapescha duvvar ils documents currigi per lur instrucziun. Tuttas commembras e tuts commembers dallas treis Conferenzas, mo era studentas e students dalla SAP e dallas universitads svizras che fan il studi da scolast cul rom romontsch san far diever da CELION. El decuors digl onn vargau ei vegniu impundiu 110 uras pil lectorat da rodund 700 paginas (la gronda part da quei ei stau *Filtric*).

9. Center didactic online romontsch – CEDID

Il Center didactic online romontsch dalla CGS (CEDID) ei staus integrais el Center didactic online rumantsch da www.educa.ch ch'ei dat dapi il 2009. Quella plattafuorm tier educa.ch ei – sco stau preannunziav a caschun dalla radunonza generala dalla CGS digl onn vargau – vegnida sliada. Il material ei deponius tier nus sin in disc cumpact ROM. In patratg ei aunc adina quel d'implementar CEDID ella plattafuorma CELION.

Las treis Conferenzas han incumbensau il menader dil project CELION, Conradin Klais, d'elaborar in concept en connex cun CELION resp. CEDID. El decuors dil proxim temps vegnan las treis conferenzas romontschas a s'occupar da quei concept.

10. Collaboraziuns dallas treis conferenzas scolasticas CGL, CRGC e CGS

Las treis conferenzas tgiran ina buna collaboraziun. Per regla s'entaupan ils presidents silmeins ina gada per onn. Uonn ei quei buca stau il cass. Plirs contacts han giu liug per mail e per telefon.

11. Collaboraziuns cun ulteriuras instituziuns ed uniuns parentadas culla CGS

La suprastanza dalla CGS ha era collaborau il 17/18 cun differentas instituziuns parentadas, en tut special cun:

- Ligia Romontscha
- Surselva Romontscha
- Lehrer Graubünden (LEGR)
- Departament per la scola populara dil cantun Grischun (DECA)



- Casa editura Ovra svizra da lectura per la giuventetgna OSL (SJW Schweizerisches Jugendschriftenwerk)
- Museum Regional Surselva
- Museum Regional La Cuort Ligia Grischa

12. Fegl scolastic grischun (LEGR)

Era uonn ei la CGS stada envidada da contribuir alla ediziun dil fevrer e digl uost. Engraziel fetg allas collegas Monique Huonder e Martina Cabalzar per lur artechels:

- “Emprender enten far termagls” (Monique Huonder; FS ediziun 02.2018)
- “Alla porta dil 10avel onn sco scolasta da classa” (Martina Cabalzar; FS ediziun 08.2018)

13. Contribuziun annuala CGS e daner da cuors Di da romontsch

Per ils suandonts motivs ein las expensas dalla CGS s’augmentadas ils davos onns:

- Las gaschas per ils referents ed ils menaders da moduls ein vegnidas alzadas (100 frs resp. 150 frs/persuna/ura prestada il Di da romontsch).
- Las indemnisaziuns dils suprastonts dalla CGS ein vegnidas alzadas (tot. 2'700 frs).
- Ils tscheins dallas localitads ella Casa da sentupada dalla claustra dallas soras dominicanas a Glion cuostan dapli che las localitads che la CGS pagava cu ei vegneva realisau il Di da romontsch ellas scolas (tot. ca. 700 frs).
- Dapi dus onns ha la CGS surdau ordvart ina part dallas lavurs da secretariat en connex cun lavurs d’administraziun dil Di da romontsch, la spediziun da mails e la tgira dalla pagina d’internet (tot. ca. 700 frs/onn).

Cunquei che las expensas survargan las entradas propona la suprastonza dalla CGS d’alzar las contribuziuns sco suonda:

- Contribuziun commembranza: 30 frs (actualmein 20 frs)
- Contribuziun participaziun Di da romontsch: 40 frs (actualmein 20 frs)

14. Engraziaments

Jeu engraziel da cor a mias collegas da suprastonza Catarina Steger (cassiera), Ricarda Caderas (assessura), a mes collegas da suprastonza Aluis Hosang (vicepresident) e Pieder Antoni Halter (actuar) per tutta lavur prestada el decuors digl onn. En nossa suprastonza regia in fetg bien spért da lavur e da cameradia. Engraziar en quest liug less jeu era a Silvana Caviezel-Lombris dad *inplus* per la fetg buna collaboraziun. Jeu engraziel plinavon a tuttas personas ed instituziuns per scadina collaboraziun culla CGS en favur dalla scola romontscha e bilingua!

Francestg Friberg, president CGS

Danis, ils 28 da november 2018

Appendix: Program Di da romontsch CGS 2018



DI DA ROMONTSCH 28.11.2018 ELLA CLAUSTRA DALLAS SORAS DOMENICANAS A GLION

08:00-08:30

CORNETS E CAFFÈ (el foyée avon l'aula)

08:30-09:30 PRELECZIUN LITTERARA (aula)

Prelecziun litterara ord *Denter las alas dil temps/Zwischen den Flügeln der Zeit* da Martin Fontana

09.45-11:00 RADUNONZA GENERALA ANNUALA (aula)

Tenor la gliesta da tractandas aschuntada

11:15-12:00 Cant

Canzuns romontschas en quater vuschs

12:15-13:30

GENTAR (en claustra)

Gentar

13:45-15:45 Moduls (en differentas localitads)

<p>MODUL 1 Filtric</p> <p>Referenta/Menadra: Nadia Cathomas</p> <p>Diember max.: 18</p> <p>Publicum en mira: pdi da tut ils scalems</p>	<p>MODUL 2 Il Schuobacheclers</p> <p>Referentas/Menadras: Andrea Veraguth, Andrea Monn, Nina Casanova</p> <p>Diember max.: 25</p> <p>Publicum en mira: 4.-6. classa, scalem superiur</p>	<p>MODUL 3 Dil graun tiel paun</p> <p>Referentas/Menadras: Aurelia Bergamin, Patricia Cadruvi</p> <p>Diember max.: 30</p> <p>Publicum en mira: pdi da scoletta, pdi 1. e 2. classa, pdi da ATT, catechetAs</p>
<p>MODUL 4 Teater</p> <p>Referent/Menader: David Flepp</p> <p>Diember max.: 20</p> <p>Publicum en mira: pdi da tut ils scalems</p>	<p>MODUL 5 Puls e ritmus, nums da tuns Lein emprender cun giugs e canzuns!</p> <p>Referenta/Menadra: Rilana Cadruvi</p> <p>Diember max.: 40</p> <p>Publicum en mira: pdi dalla 2.-6. classa</p>	<p>MODUL 6 Giugs el lungatg</p> <p>Referenta/Menadra: Monique Huonder</p> <p>Diember max.: 25</p> <p>Publicum en mira: pdi da tut ils scalems</p>

15:45

FIN

REMARCAS

- Annunzias: www.cgsurselva.ch (mintgin annunzia sesez)
- Davos termin d'annunzia: mesjamna, ils 10.11.2018
- Il moduls dil suentermiezdi han in diember da participonts limitau.
- La contribuziun annuala da 30.— frs e la contribuziun participaziun al DDR18 da 40.— frs vegnan incassai suenter la radunonza generala el foyée avon l'aula (ca. allas 11.00) *
- Igl incasso pil gentar + cornets e bubrondas duront igl entir di (tot. 30.— frs) succeda gest suenter il gentar entras la Casa da Sentupada. Il gentar secumpona da treis tratgas, inclusiv aua naturala da Grander ed in caffè.

* priu che la radunonza generala digl avonmiezdi approbeschi las duas contribuziuns



Descripziuns dils moduls (13:45-15:45)

Modul 1 → Filtric

Descripziun: Nus sortin ils fegls da lavur dil mied d'instrucziun *Filtric* tenor ils treis ciclus dil P21 e luvrein praticamein vid in battegl che selai realisar ell'instrucziun.

Referenta/Menadra: Nadia Cathomas

Diember participontas/participonts max.: 18

Publicum en mira: tuts scalems

Modul 2 → Ils Schuobacheclers

Descripziun: *Ils Schuobacheclers* ei in da plirs luvratoris ch'il Museum Regionala Surselva (MRS) porscha. Per cumpletar quei luvratori ha ina grupp elavurau per incumbensa dalla CGS material didactic multifar per la scola. Il modul 2 che vegn purschius al Di da romontsch possibilitescha d'ina vart d'emprender d'enconuscher l'exposiziun ed il luvratori dil MRS, sco era il niev material didactic.

Affons avon 150 onns han giu per part ina tresta sort... principalmein muort pupira han els stuiu bandunar lur patria ed ir la primavera el Schuob, ina cuntrada jastra cun lungatg jester, per gudignar il paun da mintga gi. Co ei quei iu? Tgei han els fatg? Nus vulein schar reviver ina historia ni l'otra, e sentir vid igl agen tgerp tgei ch'ei ha muntau dad ir egl jester.

Referentas/Menadras: Andrea Veraguth, Andrea Monn, Nina Casanova

Diember participontas/participonts max.: 25

Publicum en mira: tuts scalems

Modul 3 → Dil graun al paun

Descripziun: *Dil graun al paun* ei in ulteriur luvratori ch'il MRS porscha. Cun visitar quei luvratori san ils scolars "lugar" sco d'antruras. Per cumpletar il luvratori ha ina grupp elavurau per incumbensa dalla CGS material didactic multifar per la scola: films cuorts, historias, introducziuns per art tecnic e textil, fegls da lavur, fotografias, receipts, ina canzun... Il modul 3 che vegn purschius al Di da romontsch possibilitescha d'ina vart d'emprender d'enconuscher l'exposiziun ed il luvratori dil MRS, sco era il niev material didactic. E quei tut a moda fetg pratica.

Referentas/Menadras: Aurelia Bergamin, Patricia Cadruvi

Diember participontas/participonts max.: 30

Publicum en mira: pdi da scoletta. pdi da classa 1. e 2. classa, pdi da ATT, catechetAs

Modul 4 → UUUUPS – zatgei ei en mei! Moviment – exerchezis da teater – exerchezis d'improvisaziun

Descripziun: In luvratori per participontAs che semovan bugen e per vegnir activAs senza sefar en. Per pli tard lu saver activar ils agens scolars senza che lezs sefan en, e svegliar lur canals d'attenziun - cun agid da "svegliarins", exerchezis el rudi ni el spazi, exerchezis da preparaziun da giugar, fuormas d'improvisaziun fundamentalas...

Referent/Menader: David Flepp

Diember participontas/participonts max.: 20

Publicum en mira: pdi da tut ils scalems

Modul 5 → Puls e ritmus, suns e tuns. Lein emprender cun giugs e canzuns!

Descripziun: Puls, sorts da tacts, ritmus, ramurs e suns e tuns, fuorma, spazi da tuns, instruments, carstgauns e lur musica. Ina cuorta investa el plan digl onn cun agid da giugs ed impuls per l'instrucziun da musica per la 3./4. classa.

Referenta/Menadra: Rilana Cadruvi

Diember participontas/participonts max.: 40

Publicum en mira: pdi 3. e 4. primara

Modul 6 → Giugs el lungatg

Descripziun: Instrucziun da romontsch ludica impulsada da giugs ord il sortiment dalla ludoteca Mustér e contuorn.

Referenta/Menader: Monique Huonder

Diember participontas/participonts max.: 25 personas

Publicum en mira: pdi da tut ils scalems



Radunonza generala CGS

Mesjamna, 28.11.2018, 09:45

Aula Claustra dallas soras dominicanas, Glion

Tractandas

1. Beinvegni
2. Preschientscha
3. Elecziun da dus dumbravuschs
4. Approbaziun dalla gliesta da tractandas
5. Presentaziun ed approbaziun dil protocol dalla radunonza generala 2017
6. Rapport presidial
7. Revisiun statuts
8. Rapport dalla cassiera e dils revisurs ed approbaziun dil quen
9. Preventiv 18/19
10. Fixaziun contribuziun annuala e fixaziun contribuziun participaziun al Di da romontsch
11. Propostas commembras/commembers
12. Informaziuns
13. Varia

Remarcas:

- Pert. tractanda 5: Il protocol dalla radunonza generala dil 2017 ei publicaus sin www.cgsurselva.ch
- Pert. tractanda 7: Ils statuts revedi ein d'anflar silla pagina www.cgsurselva.ch
- Pert. tractanda 10: En vesta al fatg che las finanzas tonschan buca per finanziair las activitads dalla CGS, ei vegniu ventilau a caschun dalla davosa radunonza generala d'alzar las duas contribuziuns. Per quei motiv propona la suprastonza d'alzar la contribuziun annuala da 20 frs sin 30 frs, e la contribuziun pil Di da romontsch da 20 frs sin 40 frs.